

Consultant di Wikima ta mira hopi similaridad entre su isla Bali y Aruba

Mentalidad di isla ta dificulta pa personanan tene otro ‘responsabel pa nan accionnan’

ORANJESTAD—E ta procedente di e otro banda di mundo, pero asina mes Janur Yasa di Wikima Partners ta reconoce hopi punto comun entre Aruba y su pais natal, Bali, Indonesia. Yasa ta un di e facilitadonan di Wikima Partners cu ta na Aruba den preparacion pa e Plan Integral y Strategico Nacional, NISP. Manera Bon Dia Aruba a muestra caba, e proceso pa yega na e NISP ta mira como e parti mas importante, ya cu e ta nifica trece hende na Aruba den combersacion cu otro pa asina haya puntonan comun kico mester ta e forma con ta hiba e pais aki den un desaroyo sostenibel.

“Mi ta sinti mi hopi firme aki, manera cu mi ta na Bali, unicamente cu Aruba ta mas chikito,” Yasa a bisa. Y esaki ta pa motibo di e coneccion Hulandes cu ta fuerte na ambos pais. Manera ta conoci, Indonesia te cu algo di 50 aña atras, tabata un colonia Hulandes. Pa Yasa, e tabata un sentimento agradabel pa mira cu Nasi y Bami Goreng por ehempel ta bon conoci y gusta na Aruba.

Kizas mas yamativo ta cu un nativo di Bali, ta bin Aruba pa yuda den e proceso di consientisacion y participacion activo di comunidad den planificacion pa Aruba, pasobra ainda na Bali, hendenan no a tuma e mesun paso pa inicia procesonan di comunicacion y combersacion cu otro.

“Mi no sa si ta cuestion di actitud di isla, pero na Bali, pasobra tur hende conoce otro, no ta tene otro responsabel pa nan accionnan,” Janur Yasa a bisa. Y esaki ta e proceso cu lo kier inicia na Aruba, esta cu pa medio di combersacionnan hendenan ta cuminza asumi responsabilidad propio pa hopi asunto.

Yasa mes a uza e ehempel di e cahanan di foam (Styrofoam) cu ta plama tur caminda na Aruba. E no ta kere cu hendenan ta laga e cahanan aki plama, pa malo, pero simplemente pa motibo cu nan no ta consiente di e peliger cu e material aki tin pa medio ambiente.

“Mi tabata na e supermercado, pa cumpra un sandwich. Mi a pidi e señora cu mi kier e sandwich, pero sin e caha di foam. E señora a traha e pan, a lor’e, pero te na final a bolbe serca mi y puntra mi di con mi no tabata kier e caha di foam,” Janur Yasa a conta. E pregunta ei a habri e caminda pa duna un splicacion riba e peliger di Styrofoam, cu no ta biodegradable y cu aki 1000 aña ainda ta un caha di foam. “Esaki ta un isla chikito, y corda cu si tur e cahanan di foam aki keda pega, y no ta caba na nada, con Aruba lo ta aki un par di decada.” Locual a yena e consultant di Wikima cu satisfaccion, ta e reaccion cu el a haya di e empleado na e supermercado. E señora a keda para keto, cu cara di asombro y despues a pasa pa conta su coleganan di e peliger di Styrofoam. “Esei ta e asercamento cu nos di Wikima ta uza. Esta pa involvi hendenan directamente den un proceso di pensa.” Den e mesun sentido aki, Yasa ta kere cu si na scol mester siña muchanan di e peliger di styrofoam, nan mes lo percura cu nan mayornan no ta tuma e cahanan aki, y no warda pa Gobierno introduci un prohibicion.

Cada persona por duna un contribucion na Aruba, y unabez cu e consciencia aki amplia, Aruba lo ta miho sirbi. Pasobra un hende ta influencia otro positivamente. Y aunke cu e NISP mester ta cla den 18 luna, no mester warda pa e accionnan te aki 18 luna.

Public15yanur